



Bersama
Prof Dr Taufiq
Yap Yun Hin

Dunia, akhirat perlu seimbang

HARIAN METRO
8/12/2016 P. 35

Sesetengah orang mungkin berfikir bahawa untuk mengikuti ajaran Islam, mereka mesti meninggalkan keperluan dunia.


Dalam erti kata lain, mereka mesti memilih antara 'agama' atau 'dunia' dan tidak boleh mengambil kedua-duanya sekali.

Pada hakikatnya, Islam tidak menyuruh umatnya untuk meninggalkan keperluan ataupun bahagian dunia mereka sama sekali.

Cuma, mereka diingatkan supaya sentiasa bersyukur, tidak lalai dan menjaga batas ditetapkan, sekali gus menyeimbangi antara tuntutan dunia dan akhirat.

Islam juga menggalakkan umatnya untuk berinteraksi dengan masyarakat sekeliling dan menjalani kehidupan normal dengan masing-masing saling berganding bahu dalam membina kehidupan harmoni.

Firman-Nya bermaksud:



SIBUK atau penat bukan alasan untuk meninggalkan solat lima waktu.

"Allah menghendaki kamu beroleh kemudahan, dan Dia tidak menghendaki kamu menanggung kesukaran." (Surah al-Baqarah, ayat 185)

Sesungguhnya Islam adalah satu agama yang mudah dan praktikal. Setiap manusia tidak pernah diminta untuk

melakukan suatu perkara di luar kemampuannya. Ibadat dan ujian yang diturunkan kepadanya adalah suatu perkara yang mampu ditanggung olehnya.

Ambil contoh, seorang suri rumah yang dibebankan dengan kerja rumah dan tugas harian

lain tidaklah diminta untuk bersolat sepanjang hari. Dia diwajibkan untuk menunaikan solat fardu yang lima pada waktunya saja.

Malah, waktu dan kepenatannya menguruskan anak dan hal keluarga turut diberikan ganjaran besar

oleh Tuhan.

Dalam satu hadis yang diriwayatkan oleh Imam al-Bukhari dan Muslim, daripada Anas RA, dia berkata: "Tiga orang datang ke rumah isteri Nabi SAW menanyakan mengenai ibadat Nabi SAW.

"Setelah diberitahu, mereka menganggap seakan-akan amal ibadat Nabi itu hanya sedikit dan mereka berkata: Di manakah tempat kami dibandingkan Nabi SAW, padahal Baginda telah diampuni semua dosanya baik yang telah lalu mahupun yang akan datang?"

"Seorang daripada mereka berkata: Saya selamanya solat sepanjang malam. Yang lain berkata: Saya selamanya berpuasa. Yang lain lagi berkata: Saya akan menjauhkan diri daripada perempuan dan tidak akan berkahwin selama-lamanya.

"Kemudian Rasulullah SAW datang dan bersabda kepada mereka: Kamu tadi berbicara begitu dan begini?"

"Demi Allah, sesungguhnya aku adalah

orang yang paling takut dan paling takwa kepada Allah di antara kamu, tetapi aku berpuasa dan berbuka, aku solat dan aku tidur malam, aku juga mengahwini perempuan.

"(Itulah sunah-sunahku) sesiapa saja yang benci terhadap sunahku, maka dia bukan termasuk golonganku."

Berdasarkan hadis ini, jelaslah kepada kita yang Islam tidak pernah menyuruh umatnya untuk menyiksa diri dan meninggalkan bahagian dunia.

Firman-Nya bermaksud: "Kemudian, setelah selesai solat, maka bertebaranlah kamu di muka bumi (untuk menjalankan urusan masing-masing) dan carilah apa yang kamu hajati daripada limpah kurnia Allah serta ingatlah akan Allah banyak-banyak (dalam segala keadaan) supaya kamu berjaya (di dunia dan akhirat)." (Surah al-Jumuah, ayat 10)

Penulis ialah Presiden Persatuan Cina Muslim Malaysia (MACMA) dan profesor di UPM